

**Ўзбекистон Республикаси Олий Суди Коррупцияга қарши
курашиш ички назорат гуруҳи томонидан 2024 йил давомида
амалга оширилган ишлар юзасидан
Ҳ И С О Б О Т**

Ўзбекистон Республикаси Олий суди Кадрлар бошқармасининг Коррупцияга қарши курашиш ички назорат гуруҳи ўз фаолиятини Ўзбекистон Республикасининг “Судлар тўғрисида”ги, “Коррупцияга қарши курашиш тўғрисида”ги Қонунлари ҳамда ички идоравий ҳужжатларга мувофиқ ташкил этиб, судлар аппаратлари ходимларининг фаолияти **қонунийлик**, фуқаролар **ҳуқуқлари**, **эркинликлари** ва қонуний манфаатларининг устуворлиги, **очиқлик** ва **шаффофлик** ҳамда бошқа асосий принциплар асосида ташкил этилишини таъминлаш билан биргаликда, суд аппарати ходимлари ўртасида **коррупциявий ҳолатларнинг олдини олиш**, уларнинг ҳуқуқий онги ва ҳуқуқий маданиятини юксалтириш ва жамиятда **коррупцияга нисбатан муросасиз муносабатни** шакллантириш ишларини жадал олиб бормоқда.

Жумладан, Ўзбекистон Республикаси Олий Суди Кадрлар бошқармасининг Коррупцияга қарши курашиш ички назорат гуруҳи томонидан Ўзбекистон Республикаси Олий Суди Раёсатининг 2021 йил 23 декабрдаги РС-72-21-сон қарори билан тасдиқланган низом талабларига мувофиқ **республика судларида 7** та текширув ўтказилди.

Ўтказилган текширувлар давомида **аниқланган ҳолатлар** юзасидан **2** нафар суд аппарати **ходими** билан тузилган **меҳнат шартномаси бекор қилинди. 13** нафар суд аппарати ходимига **“ҳайфсан”** интизомий жазо чораси қўлланилди. Республика судларининг барча ходимлари билан аниқланган камчиликлар такрорланишини олдини олиш мақсадида белгиланган тартибда **профилактик суҳбатлар** ўтказилди.


5 та вилоятда **амалий ёрдам кўрсатиш йўли билан ўрганишлар** ўтказилди. Ўрганиш натижалари юзасидан **5** нафар ходим эгаллаб турган **лавозимидан озод этилди, 9** нафар ходимга **“ҳайфсан”** ҳамда **1** нафар ходимга **“жарима” интизомий жазо чораси** қўлланилди.

Шу билан бирга мунтазам равишда **жисмоний ва юридик шахсларнинг мурожаатлари** пухта ўрганиб келинмоқда. Ўтказилган ўрганишлар натижасида аниқланган ҳолатлар юзасидан **1** нафар суд аппарати ходими билан тузилган **меҳнат шартномаси бекор қилинди.**

Ўзбекистон Республикаси Олий Суди Раиси томонидан 2024 йил 28 январда тасдиқланган **судларда коррупциявий ҳолатларнинг олдини олиш** чораларини кучайтириш ҳамда кадрлар салоҳиятини ошириш, меҳнат ва ижро интизомини яхшилаш бўйича комплекс чора-тадбирлар режасига мувофиқ Олий Суд ва барча қўйи судларда кадрларни **ишга қабул қилиш жараёнини тубдан ўзгартириш** юзасидан чоралар белгиланиб, судларда кадрлар захирасини яратиш, танлаш ва ишга қабул қилиш жараёнининг механизми янгитдан ишлаб чиқилди.

Хусусан, республика судлари аппаратларини кадрлар билан таъминлаш ҳамда уларни жой-жойига қўйишда **коррупциявий омилларнинг олдини олиш** мақсадида Ўзбекистон Республикаси Олий Суди Раёсатининг тегишли қарори билан Олий Суд ва қўйи судларда кадрлар захирасини шакллантириш ва номзодларни ишга қабул қилиш тартиби тўғрисидаги низом янги таҳрирда қабул қилиниб, номзодларни танлаш, саралаш ҳамда лавозимларга тайинлаш **механизмлари такомиллаштирилди**, ҳар бир номзодни Коррупцияга қарши курашиш ички назорат гуруҳи томонидан **комплекс ўрганиш** ва **тайинловларни келишиш** тартиб-таомили **жорий этилди**.

Ушбу тартибга мувофиқ Ички назорат гуруҳи томонидан **ҳисобот даврида** жами **933 нафар** номзод комплекс ўрганилган бўлиб, шундан вилоят ва унга тенглаштирилган судлар раисларининг **101 та** ёки **11** фоиз тақдимномаси **рад қилинди**, **832 та** ёки **89** фоиз тақдимнома бўйича **розилик** берилди.



Ўтказилиб келинаётган ўрганишлар давомида қўйи судларда етарли даражада ўрганилмаган ҳамда эҳтимолий коррупцияга мойиллиги бўлган номзодларнинг суд тизимига киришининг барвақт олди олинмоқда.

Юқори малакали ҳамда етарли билим ва кўникмаларга эга ноизодларни ишга жалб қилиш кадрларни танлаш ва жой-жойига қўйишда коррупциянинг оидини олиш ишларида муҳим ўрин тутишини алоҳида таъкидлаш зарур. Бу борада суд тизимини олий юридик маълумотга эга бўлган малакали ва **ҳалол-пок кадрлар билан тўлдириш**, уларнинг малакасини мунтазам равишда ошириб бориш ҳамда судларда кадрлар қўнимсизлиги ва **коррупция ҳолатларининг ҳар қандай кўринишига** барҳам бериш мақсадида республикамизнинг юридик кадрларни тайёрловчи **13** та йирик олий таълим муассасаси билан **ҳамкорлик меморандумлари** имзоланди.

Олий Суд Раёсатининг тегишли қарори билан тасдиқланган Ўзбекистон Республикаси судлари судьяларининг одил судловни амалга оширишдаги ва суд ходимларининг хизмат вазифаларини бажаришдаги фаолияти давомида муайян ҳаракатларни бажариш ёки бажармаслик учун ҳақ (пора) таклиф қилинганлиги тўғрисида **хабар бериш** ва **уни кўриб чиқиш тартиби** ҳам коррупцияга қарши курашиш борасида муҳим ҳужжат бўлиб хизмат қилмоқда. Таъкидлаш жоизки, ушбу тартиб амалда ўз натижаларини бермоқда, **тартибга риоя қилган** ва **ўз хизмат бурчини намунали** адо этган судья ва суд аппарати ходимлари **муносиб рағбатлантирилмоқда**.

Шу билан бирга, Ўзбекистон Республикаси Президентининг 2021 йил 17 июндаги “Давлат органлари ва ташкилотларининг фаолияти очиқлигини таъминлаш, шунингдек, жамоатчилик назоратини самарали амалга оширишга доир қўшимча чора-тадбирлар тўғрисида”ги ПФ–6247-сон, 2022 йил 14 июндаги “Давлат органлари ва ташкилотлари фаолиятининг очиқлик даражасини ошириш ва баҳолаш тизимини жорий этиш чора-тадбирлари тўғрисида”ги ПФ–154-сон Фармонлари ҳамда Олий Суд Раисининг 2024 йил 26 июлдаги 8-сон фармойиши ижросини таъминлаш мақсадида Кадрлар бошқармаси Ички назорат гуруҳи томонидан тизимда **коррупцияга қарши курашиш** ҳамда **унинг олдини олиш** борасида амалга оширилаётган ишлар **очиқлигини таъминлаш** бўйича қатор чора-тадбирлар амалга оширилди.

Хусусан, Олий Суднинг расмий веб-сайтида **“коррупцияга қарши курашиш”** ойнаси яратилиб, норматив-ҳуқуқий ва ички идоравий ҳужжатлар, амалга оширилаётган ишлар ҳамда тарғибот материаллари, Ички назорат гуруҳининг иш режалари ва ҳисоботлари **жамоатчилик учун эълон қилинди**.

Бундан ташқари, **коррупция ҳолатлари ҳақида хабар бериш** учун мўлжалланган **алоқа каналлари** тўғрисида маълумотлар жойлаштирилди,

шунингдек, Коррупцияга қарши ички назорат гуруҳига **онлайн хабар юбориш** учун **махсус платформа** ишга туширилди. Соҳани тартибга солувчи қатор ички идоравий ҳужжатлар қабул қилинди.

Суд аппарати ходимларини коррупцияга қарши курашиш бўйича ўқитиш дастури қабул қилиниб, бугунги кунда турли мавзулар бўйича уларга лекциялар ва амалий семинар машғулоти ўтказилиб келинмоқда.

Шу билан бирга, Ҳуқуқни муҳофаза қилиш академияси билан ҳамкорликда **“Манфаатлар тўқнашуви тўғрисида”**ги Ўзбекистон Республикаси Қонуни мазмун-моҳиятини тушунтириш ҳамда судларда **манфаатлар тўқнашувини бошқариш** юзасидан республика судлари аппаратлари ходимлари учун қисқа муддатли **малака ошириш курслари** ташкил қилиниб, натижасида барчасига сертификатлар топширилди.

Бундан ташқари **2024 йил** давомида Олий Суднинг расмий веб-сайти ҳамда ижтимоий тармоқлардаги расмий саҳифаларида мунтазам равишда эълон қилиб келинган суд органларидаги коррупция ҳолатлари ҳақида хабар беришга мўлжалланган **@suduzbot** Телеграм боти, **(71) 239-01-79** ишонч телефони ҳамда Ўзбекистон Республикаси Олий Судининг расмий веб-сайтидаги **махсус платформаси** орқали жами **320** та мурожаат Коррупцияга қарши курашиш ички назорат гуруҳи томонидан белгиланган тартибда ўрганиб чиқилди.

Маълумот учун: 201 та ёки 63 фоиз мурожаат телеграм бот орқали, 113 та ёки 35 фоиз мурожаат ишонч телефони орқали, 6 та ёки 2 фоиз мурожаат расмий веб-сайтидаги махсус платформа орқали келиб тушган.

Шундан **314** та (**98** фоиз) мурожаат бўйича кўтарилган масалалар ишчи тартибда ҳал этилиб, фуқароларга тегишли **ҳуқуқий тушунтиришлар берилди**, **6** та (**2** фоиз) мурожаат тааллуқлилиги бўйича кўриб чиқиш ва ҳуқуқий баҳо бериш учун **ҳуқуқни муҳофаза қилувчи органларга** юборилди.

Ҳисобот даврида алоқа каналлари орқали Ички назорат гуруҳига суд аппарати ходимлари томонидан **коррупциявий хатти-ҳаракатлар** содир этилганлиги ҳақида **хабарлар келиб тушмаган**.